

**ქალაქ ქუთაისის მუნიციპალიტეტის საკრებულოს კულტურის, განათლების,
ახალგაზრდობის საქმეთა და სპორტის კომისიის თავმჯდომარის
ბეჟა ქებულაძის საანგარიშო შეხვედრა მოსახლეობასთან**

დემოკრატიული სახელმწიფოს მშენებლობის პროცესებში, საჯაროობის ფუნდამენტურ პრინციპს განსაკუთრებული ადგილი უჭირავს. მე, როგორც საკრებულოს დეპუტატი, ამავდროულად კულტურის, განათლების, ახალგაზრდობის საქმეთა და სპორტის კომისიის თავმჯდომარეს, ვალდებული ვარ ყოველწლიური ანგარიში ჩაგაბაროთ გაწეული საქმიანობის შესახებ.

კანონით ნაკისრი კონკრეტული ვალდებულება, რეალურ შესაძლებლობებს გვაძლევს მოსახლეობას მივაწოდო სრულყოფილი და ობიექტური ინფორმაცია ადგილობრივი თვითმმართველობის საკანონმდებლო შტოს საქმიანობის შესახებ. ნდობის მაღალი მაჩვენებელი, რომელიც აშკარად მიმდინარეობს საზოგადოების მხრიდან, ზრდის ჩვენს პასუხისმგებლობას ჩვენი საქმიანობისა და ამომრჩევლის მიმართ. ჩვენი საქმიანობის ძირეული პრინციპებიც ხომ კანონის უზენაესობის დაცვა და მოქალაქეთა მხრიდან გამოცხადებული ნდობის მაქსიმალურად გამართლებაა!

საანგარიშო პერიოდში რეგლამენტით და სხვა შესაბამისი კანონმდებლობით განსაზღვრული პროცედურების დაცვით, როგორც საკრებულოს წევრმა და ამასთანავე კომისიის თავმჯდომარემ მონაწილეობა მივიღე საკრებულოს, საკრებულოს ბიუროსა და საკრებულოს კომისიებში სხდომებში.

ქალაქ ქუთაისის მუნიციპალიტეტის საკრებულოს კულტურის, განათლების, ახალგაზრდობის საქმეთა და სპორტის კომისია თავის საქმიანობას ახორციელებს საქართველოს ორგანული კანონის „ადგილობრივი თვითმმართველობის კოდექსი“, ქალაქ ქუთაისის მუნიციპალიტეტის საკრებულოს რეგლამენტის, ქალაქ ქუთაისის მუნიციპალიტეტის საკრებულოს კულტურის, განათლების, ახალგაზრდობის საქმეთა და სპორტის კომისიის დებულებისა და სხვა ნორმატიული აქტების შესაბამისად.

ქალაქ ქუთაისის მუნიციპალიტეტის საკრებულოს კულტურის, განათლების, ახალგაზრდობის საქმეთა და სპორტის კომისია მონაწილეობდა 2023 წლის ბიუჯეტის ფორმირებაში. კომისია აქტიურადაა ჩართული როგორც კულტურის, განათლების, ახალგაზრდობის საქმეთა და სპორტის მიმართულეებით სხდასხვა აქტივობებსა და ღონისძიებებში, ასევე საზედამხედველო ფუნქციებიდან გამომდინარე მათ მონიტორინგში. ის მნიშვნელოვანი ფუნდამენტი ჩვენი კომისიის მუშაობისა, რომელსაც ჯერ კიდევ შარშან ჩაეყარა საფუძველი და რომელიც კულტურის განვითარების სტრატეგიას გულისხმობს, აქტუალობასა და მნიშვნელობას სძენს ყველა კულტურული ღონისძიების დაგეგმვის, განხორციელებისა და კონტროლის ეფექტური მექანიზმის ამუშავების პროცესს.

კომისიის ყურადღების არეში მოექცა ადგილობრივი ბიუჯეტით განსაზღვრული კულტურის პროგრამის განხორციელების ხელშეწყობის საკითხები. კულტურის პროგრამიდან წლის განმავლობაში ფინანსური მხარდაჭერა აქვთ არტისტებსა და ქურუმებს, მხატვრებს, ადგილობრივ თეატრებსა და ანსამბლებს.

საიუბილეო თარიღებთან დაკავშირებით ქუთაისელი მწერლებისა და პოეტების ნაშრომების გამოცემის ფარგლებში გამოიცა ცირა შალაშვილისა და თეიმურაზ ლანჩავას ერთტომეულები, ასევე ელისო ქაროსანიძის კრებული. დაფინანსდა რეზო გაბრიაძის წიგნის „ჩემი პატარა ქალაქი“ ურთიერთთანამშრომლობის მემორანდუმის ფარგლებში.

ქუჩის მხატვრობის „სტრიტ არტის“ ფარგლებში 2023 წელს მოიხატა 4 ლოკაციაზე 6 კედელი, ხოლო გასულ წელს ჯილდოს სახით გაიცა თანხა 2 გამარჯვებულ ესკიზის ავტორზე.

ქ. ქუთაისში ქართული ხალხური ფოლკლორული ტრადიციების აღორძინების, ქართული ხალხური ფოლკლორის პროპაგანდისა და განვითარების მიზნით ხანდაზმულთა ფოლკლორული ანსამბლი „ბერმუხა“ დაფინანსდა ყოველთვიური ხელფასით ურთიერთთანამშრომლობის მემორანდუმის ფარგლებში. ქუთაის-გაენათის ეპარქიას მემორანდუმის საფუძველზე გაეწია მხარდაჭერა კომუნალური, ინფრასტრუქტურული და სხვა საჭიროებების დაფინანსების კუთხით.

თეატრალური კულტურის თვითმყოფადობის შენარჩუნების, თეატრალური ხელოვნების განვითარებისა და ინოვაციური პროექტების განხორციელების ხელშეწყობის მიზნით ქუთაისის ლ. მესხიშვილის სახელობის პროფესიულ სახელმწიფო დრამატულ თეატრს, მ. ბალანჩივაძის სახელობის ოპერისა და ბალეტის პროფესიულ სახელმწიფო თეატრს, ქუთაისის ნიღბებისა და პანტომიმის თეატრს, ი.გოგებაშვილის სახელობის თოჯინების პროფესიულ სახელმწიფო თეატრს გამოეყო თანხა მემორანდუმის ფარგლებში ქუთაისის თეატრების ფუნქციონირების მხარდაჭერის ქვეპუნქტიდან.

განსაკუთრებული მნიშვნელობა აქვს ცენტრალური მთავრობისა და აგილობრივი ხელისფულების ურთიერთთანამშრომლობის ფარგლებში დაგეგმილ და შესრულებულ გლობალურ პროექტებს, როგორებიცაა ოლიმპიური სტანდარტების აუზის მშენებლობა, განახლებული ქუჩები, გამზირები, სკვერები და რაც განსაკუთრებით მნიშვნელოვანი გადაწყვეტილებაა, სკოლის მოსწავლეების გათავისუფლება მუნიციპალური ტრანსპორტის გადასახადისაგან.

„ქუთაისქალაქობა 2023“ ფარგლებში გაიმართა სხვადასხვა აქტივობები, კონცერტები, საერთაშორისო ტურისტული ბაზრობა, თანამედროვე ხელოვნების საერთაშორისო ფორუმი „ქარავან არტ ფორუმი ქუთაისი 2023“ მსოფლიოს სხვადასხვა ქვეყნებიდან მოწვეული მხატვრების, ფოტოხელოვანების, ხელოვნებათმცოდნეების და კურატორების მონაწილეობით (საქართველო, საფრანგეთი, გერმანია, ბელგია, პოლონეთი, ესტონეთი, ლიტვა, უკრაინა და საბერძნეთი).

ვინაიდან მუნიციპალიტეტისთვის პრიორიტეტია ქუთაისში მცხოვრები ნიჭიერი შემოქმედი ადამიანის ხელშეწყობა, მიმდინარე წელს განხორციელდა ფოტოპროექტი „ბოდიფონტი“ დავით კაკაბაძის სახვითი ხელოვნების გალერეაში; 3 საკონცერტო ღონისძიება, დაფინანსდა 1 მოკლემეტრაჟიანი და 1 დოკუმენტური ფილმის გადაღება ურთიერთშეთანხმების მემორანდუმის ფარგლებში, 1 სატელევიზიო პროექტი, გაიხსნა ქუთაისის სიმღერისა და ცეკვის სახელმწიფო აკადემიური ანსამბლის ვარსკვლავი.

განათლების მიმართულებით, ყურადსაღებია განსაკუთრებული წარმატებების მქონე ახალგაზრდების წახალისება სტიპენდიით, 12 სტუდენტს წლის განმავლობაში ყოველთვიურად ერიცხება 300 ლარი. დღემდე განხორციელდა ისეთი ღონისძიებები, როგორცაა კალიგრაფიის კონკურსი; ინტელექტუალური კონკურსი ჩატარდა როგორც ბრენ-რინგის, ასევე ჯეპარდის მიმართულებით. საჯარო სკოლების VIII-IX-X კლასების 120 წარმატებული მოსწავლისთვის მოეწყო საზაფხულო ბანაკი სამ ნაკადად დაბა ბაკურიანში.

მუნიციპალიტეტისთვის პრიორიტეტია ახალგაზრდების მრავალმხრივი განვითარების ხელშეწყობა, მათი საზოგადოებრივ ცხოვრებაში ინტეგრირება, ახალგაზრდული ინიციატივების მხარდაჭერა, ჯანსაღი ცხოვრების წესის დამკვიდრება. ახალგაზრდული პროგრამის ერთ-ერთ მნიშვნელოვან პრიორიტეტს წარმოადგენს, ახალგაზრდული ინიციატივების მხარდაჭერა, ამ მიზნით, ადგილობრივ ბიუჯეტში გამოიყო 130 000 ლარი, რომლის ფარგლებში დაფინანსდა ათი ინიციატივა, მათ შორის: („სოციალური პლატფორმა სტარტაპერებისთვის; „საზაფხულო კინო სკოლა ქუთაისელი ახალგაზრდებისათვის“; „სამოქალაქო თავდაცვა და სიმულაციური სწავლება“; „ახალგაზრდები მშვიდობიანი თანაცხოვრებისთვის“; „ციფრული კომპეტენციების განვითარება ახალგაზრდებში“; „გასტრონომიული ფესტივალი და ადგილობრივი მუსიკოსების სადამო“; „გააუმჯობესე შენი მომავალი“; „ახალგაზრდების ინფორმირებულობა ჩართულობის გზით“; „შეზღუდული შესაძლებლობის მქონე პირის პერსონალური ასისტენტების მომზადება და სერვისის პილოტირება ქუთაისის მუნიციპალიტეტში“). აღსანიშნავია, რომ ადგილობრივი თვითმმართველობის ბიუჯეტიდან 65 000 ლარით დაფინანსდა ზამთრისა და ზაფხულის ლიდერთა სკოლები, სადაც 14-29 წლამდე ასაკის 180-მდე ახალგაზრდამ მიიღო მონაწილეობა.

ტრადიციად იქცა ჩვენს ქალაქში როკმუსიკის ფესტივალის „როკაიას“ ჩატარება, რომელიც ყოველწლიურად უფრო მასშტაბური ხდება და წელს 10 000-მდე მსმენელი დაესწრო. წელს პირველად, ქუთაისში, ახლადრეაბილიტირებულ ასსაფეხურიან კიბესთან ჩატარდა ქუთაისის ახალგაზრდული ფესტივალი, რომელშიც 120-მდე მოხალისე-ახალგაზრდა მონაწილეობდა, ფესტივალში მონაწილეობა 8 000-მდე ადამიანმა მიიღო. აღსანიშნავია, რომ ახალგაზრდული პროგრამის ბიუჯეტიდან ხდება საერთაშორისო პროექტებსა და კონფერენციებში ქუთაისელი ახალგაზრდების მონაწილეობის მხარდაჭერა.


სპორტის ქვეპროგრამის მიზანია სპორტის სხვადასხვა სახეობების წახალისება და ჯანსაღი ცხოვრების წესის პოპულარიზაცია. მნიშვნელოვანია, რომ ქუთაისელ წარმატებულ 35 სპორტსმენს წლის განმავლობაში შედეგების მიხედვით ერიცხება ყოველთვიური სტიპენდია 9860 ლარის ოდენობით, ხოლო ოლიმპიურ ჩემპიონს ყოველთვიურად 1500 ლარი, ასევე ფულადი ჯილდოა დაწესებული საქართველოს, ევროპისა და მსოფლიო ჩემპიონატებზე გამარჯვებული სპორტსმენების, გამარჯვებული ვეტერანი სპორტსმენებისა და მწვრთნელთათვის. აღსანიშნავია, რომ სპორტის ბიუჯეტიდან აქტიურად ხდება შშმ პირთა ტურნირებში მონაწილეობის მხარდაჭერა.

მიმდინარე პერიოდში ჩატარდა რვა საერთაშორისო და ერევნული ტურნირი, რომელშიც საქართველოს გარდა მონაწილეობენ თურქეთის, სომხეთისა და აზერბაიჯანის გუნდები.

მიმდინარე წელს ქალაქ ქუთაისის მუნიციპალიტეტმა, საქართველოს პარლამენტთან ერთად, გაეროს განვითარების პროგრამის („UNDP“) ფინანსური მხარაჭერით შეიმუშავა სპორტის განვითარების კონცეფცია. ადგილობრივი თვითმმართველობა უზრუნველყოფს სპორტის იმგვარი პოლიტიკის დაგეგმვასა და განხორციელებას, რომელიც ემსახურება ინკლუზიური ადგილობრივი საზოგადოების გაძლიერებას, მის კეთილდღეობასა და სოციალურ-ეკონომიკურ განვითარებას. კონცეფციის სტრატეგიული პრიორიტეტები და მიზნები განისაზღვრა დაინტერესებულ მხარეებთან გამართული კონსულტაციების, ჩატარებული თვისობრივი და რაოდენობრივი კვლევების, აგრეთვე ქალაქ ქუთაისის მუნიციპალიტეტის ადგილობრივი თვითმმართველობის მონაწილეობით გამართული სამუშაო შეხვედრების შედეგების გათვალისწინებით. ქალაქ ქუთაისის სპორტის პოლიტიკის სხვადასხვა ასპექტის სიღრმისეული ანალიზი, საბაზისო მონაცემები, პოლიტიკის სუსტი და ძლიერი მხარეები, რისკები და შესაძლებლობები, აგრეთვე პოლიტიკის გაუმჯობესების ძირითადი მიმართულებები წარმოდგენილია 2023 წელს მომზადებული კვლევის ანგარიშში „ქუთაისის სპორტის პოლიტიკის ანალიზი“.

როგორც კულტურის, განათლების, ახალგაზრდულ საქმეთა და სპორტის კომისიის თავმჯდომარე ჩართული ვარ ქალაქის სახელოვნებო ცხოვრებაში, ვიღებ მონაწილეობას სხვადასხვა საინფორმაციო შეხვედრებში, კონფერენციებსა თუ ტრენინგ-სემინარებში, ვაჯილდოებთ სიგელებითა თუ მედლებით, კომპიუტერებითა და სხვადასხვა წამახალისებელი საჩუქრებით სტუდენტებს, მოსწავლეებს და სხვადასხვა სპორტულ თუ სახელოვნებო კონკურსში გამარჯვებულებს. ოფიციალური შეხვედრების გარდა, მაქვს სისტემატური ხასიათის შეხვედრები მოქალაქეებთან. ხდება მათი პრობლემების და ინიციატივების მოსმენა, უფლებამოსილების ფარგლებში ვცდილობ მოვახდინო რეაგირება მერიის სამსახურებთან შუამდგომლობისა და ურთიერთთანამშრომლობის საფუძველზე.

ქ. ქუთაისის მუნიციპალიტეტის საკრებულოს
კულტურის, განათლების, ახალგაზრდობის საქმეთა
და სპორტის კომისიის თავმჯდომარე:



ბეკა ჩქვულაძე